



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



TAPAK 3

Indonesia Open: Srikanth Quarterfinals-i iogo

Ukraine-i PM Modi nem global peace summit nung shilem agidaktsüner



VOL. XX NO. 243 (ADOK 243) DIMAPUR ROGONÜ (FRIDAY)

AAMI (JUNE) 16 2023

₹ 5.00

NFHRCC-i akhangba nung Ao Senden dena lir

Dimapur, Aami/June 15 (TYO): 13 buba Nagaland Legislative Assembly indang 12 buba session September 22, 2022 nü alidang North Eastern Council kübok Foothill Road yanglutsü Nagaland sorkari molungsoa pangzüng renemba Ao Senden-i pelashishia agizüker, ta Ao Senden tir Chubawati Longchar aser tongti

zülur Imtipokyim nati sangdong ka ajanga ashi. Nagaland Foothill Road Coordination Committee (NFHRCC) ajanga Nagaland sorkar dang iba maparen menua melie inyaktüsü ayongzüka June 8, 2023 nü osang kaket tem nung adoka aliba nung Ao Senden dena lir, ta sangdong ajangasa ashi.

Imphal nung nüburtem aser security forces raratep

Imphal, Aami/June 15 (Agencies): Manipur yimtiba, Imphal nung nisung telok ka aser security personnel tsünga Brehostibarnü raratepdang nisung asem kanga sashia yirua liasü.

Manipur nung tesem balala nung lendong atalokba osang maneni angashir.

State nung mepetmemsü tali adokba ajanga Army aser Assam Rifles temi "area domination operations" tali ulushia agir.

Manipur nung kin ana tsünga mangatetep adoka May 3 nungi tenzüka azüdokshia ki o jen rongtsüba mapang nisung 100 dak tema takum samaogo aser meyririjang aika tesem balala nung jenoka lir.

Bodhbarnüa Imphal East district kübok Khamenlok tesem nung azüdokshi lendong nung nisung toku asü aser ter kanga sashia yirua liasü.

Cyclone Biparjoy-i Gujarat nung kongshiogo

Gandhinagar, Aami/June 15 (Agencies): Brihostibar nikongdang 6:30 ako meta Cyclone Biparjoy, Gujarat tükum tonga liasü.

alaka asü-amaba osang mali, ta ktdangsur temi ashir. Iba yipru yagi Gujarat kübok Kachchh aser Rajasthan south tsütsü tesashiba kongshitsü akok, ta takzütetali.

Cyclone Biparjoy nungi nüburtem kumzüksü mechi Ahmedabad yimti aser rural district education ktdangsur temi June 16 nü school ajak shibangtsü totuyuba agütsüogo.

Iba cyclone mechi Gujarat Technological University (GTU) ajanga June 15-17 anogotem agitsü aliba tatidang thinenogo.

World Bank teyari nung NHP kübok mapa jenti inyakogo: Minister Paiwang

Kohima, Aami/June 15 (TYO): Guwahati nung mezüngbuba Northeast Knowledge Conclave for Health senden nung Nagaland nungi Minister, Health and Family Welfare, P. Paiwang Konyak dena liasü.

Brehostibarnü iba senden nung jembidang, Northeast Conclave for Health ajanga North-East India nung aliba state tir sapang ka nung lungjemdaktsür aser iba ya ajanga state shia health tsütsü teblemetsü balala lemsatapa shisa agütsüteptsü, ta pai ashi.

Nagaland Health Project (NHP) kübok Nagaland state nung maparen balala inyakba indang jembidang, NHP ya World Bank ajanga senotsü teyari agütsüba state level project mezüngbuba liasü, koba Department of Health & Family Welfare, Government of Nagaland ajanga mapa kuma inyak aser pilot project ama district ana nung 2015 kum tenzüker aser tanünga district 16 nung 2017 nungi tenzüker, ta Konyak-i metetdaktsü.

Mezüngbuba project component - Community Action for Health and Nutrition liasü aser ibai Community Result Based Financing (RBF) nung rangloker yimtsüng sasep nung Health & Nutrition tajungba kumdaktsütsü

nükjidong nung health committee temi shilem agi aser iba sülen District level RBF aidaktsü, ta pai ashi.

Iba RBF component ya District Hospital 11 aser CMO establishments densema 500 HCs (21 CHCs, 56 PHC, 100 SCs aser 323 VHCs) nung takok ngua inyakogo, ta pai ashi.

Tesüiba kum tenet tsünga health committee ajak (500) tashi itshi aser asendenshi, Health Centres ajak nung co-chair nung tetsür shimoka liasü, aser health aser societal issue nung awareness agüja liasü, ta Minister Paiwang-i metetdaktsü.

Health committee tem nung RBF investments ajanga nüburtemia shilem agitsü ajungmeso aser yimtsüng 115-i pei health committee nem senotsü agi yaritep aser nisung ajaki amai nübu agia yaritep aser putu menden aser kaketsür tentet temi social audit agi aser yamaji inyakba ajanga maparen tajungba kumdaktsü, ta pai ashi.

Health Systems Strengthening (HSS) nung tanabuba component ya 'input-based financing' inyakim ka lir, koba World Bank guided procurement process nung aliba ama senotsü amshi, ta minister-i metetdaktsü.

Nagaland Health Project

investment ya WATSAN ki o jen yangluba, Solar, Supply Chain Management, IT aser Biomedical Waste Management Act agi melaba ama Biomedical Waste ktdangsuba nung amshi, ta pai ashi.

Service tajungtiba nung agütsütsü mechi Hospital Information System (HIS), Bio-medical waste management reporting system & Human Resource Management System, Drug and Vaccine Distribution and Management System (DVDMS) amala digital sapang aika yanglu.

Supply chain management system tajungba kumdaktsütsü asoshi state warehouse ka yanglu, Nursing Schools aser Para Medical Training Institute pezü aser health facilities 176 yanglushiba maparen inyakogo, ta pai ashi.

Nagaland Health Project kübok Nagaland Medical College Kohima nung Library aser Theatre Block teyangludak lir.

COVID mapang iba project ajanga state tesem ajungalen Oxygen cylinders aser Concentrator tem agütsü aser district hospital ti nung Oxygen Generation Plant yanglu aser health facilities balala nung Oxygen pipelines inok, ta Paiwang-isa ashi.

Nisung ka kum 20 tepuokdak ayutsü obendang agütsü

Dimapur, Aami/June 15 (TYO): Tai tonglokja alisang Vishnu Sahani kum 20 tashi District Jail Kohima nung 'rigorous imprisonments' temerenshi agütsütsü Duvelu Vero NJS, PD & SJ cum Special Judge, Kohima ajanga June 13, 2023 nü obendang agüja liasü.

Iba obendang nung ashiba agi, Vishnu Sahani yagi arishi kum 16 majung tanur ka dak tashiyim

amshia shi nung medem. Iba ken o ya UBSI Vikuobinuo-i bushisüngdang asü aser court nung Special Public Prosecutor Sashimongla Jamir-i anir ken o jembia liasü.

Vishnu Sahani yagi U/S 376 AB IPC R/W 4 POCSO ACT nung aibelenba kuli tejangja ngutet, ta Special Judge ajanga ashi.

Tai tonglokja alisang ya

tepuokdak kum 20 ayutsü aser senchi sen 3000 achitsü aser senchi memonoktetra ita asem atema 'simple imprisonment' alitsü.

Special Judge-isa state sorkari renema aliba ama timtem ajurur alir nem Kohima District Legal Service Authority ajanga Victim Compensation Scheme kübok senotsü teyari agütsütsü totuyuba agüja liasü.

BJP sorkari nüburtem tali ang tim temdaktsür: NPCC

	LPG	Petrol	Diesel	Mustard Oil	Atta	Milk
2014	₹ 410 /cylinder	₹ 71 /litre	₹ 55 /litre	₹ 90 /litre	₹ 22/kg	₹ 35/litre
2023	₹ 1130 /cylinder	₹ 95-100 /litre	₹ 83-98 /litre	₹ 143 /litre	₹ 34.5/kg	₹ 53/litre
% increase	169%	57%	78%	58%	56%	51%

Dimapur, Aami/June 15 (TYO): Nagaland Pradesh Congress Committee NPCC) tir S. Spongmeren Jamir ajanga sangdong ka nung, "Kechiba India nung osettsüset jenjang asr mapa manguba tali akümer? Kechiba takartem tali takaba akümer aser sensaksertem tali tesensakba akümer? Rongsenkeren nung telemsa tali adokaka kechiba nübur meyang ki o jen PM Modi indang medemer tem dang ayoker?" ta asüngdanga liasü.

business tila inyakertem samatsü aser tawa sangdongba Demo 2.0 ya ner sorkar temolung madangba nenshia sayuba lir, ta sangdong ajanga ashi.

Farm laws tamajung asem agiendang aluyimertem den tezüngzüktetp agia aliba kechiba akümsüboaba mamshir? Kechiba MSPozüng agi memelar? Tesüiba kum tokü tsünga kechiba aluyimer income metemloker? ta pai asüngdang.

Teshimtet tembar kar nem BJP-i agriculture amoktsütsü merangba aluyimer temi nokdaka tamakok ajuru. Ajisüaka BJP sorkari maneni aluyimer temi akhangba tongtipang onüktem nokdang. Aluyimer ka indang 'average income' ya anogo ka nung sen 27 lir aser aluyimba oset nung GST aliba ajanga timtem tali agütsür aser ali temu amala nung subsidy ajemtsüogo, ta ashi.

Kechiba nüburtemi meranga inyaker bendenba sen LIC aser SBI nung yua aliba ner tembar Adani ajangzüksü mechi lendong nung yutsür? Kechiba nai auer tem jena yoker? BJP-i yimsü asüba state tem nung ochimashi aliba atema kechina na ola madoker aser kechiba India nung tim temdaktsür? ta asüngdang.

Kechiba China-i maneni India nung litsü amokbanger? China den senden 18 menogo saka India nung litsü agütsütsü memolunger aser maneni tashiyim amshir. 2020 kum nungi China-i India nung litsü-lika 1,500 sq km amokbangba atema BJP ola madokba ajanga security tsütsü BJP tamakok anguba sayur. China tesashiba kuma asen temeden nung küli makaba nung takangba agütsüdang sorkar ola madoki kazür. BJP

sorkar arur kum tokü nung National Security Strategy mali aser defence tsütsü sen indokba tangsa tajemba. Ano nüburtemi sapua magizükba Agnipath Scheme amala yagi asem Armed Forces tashi maitba kumdaktsür, ta NPCC tir ajanga aitsü.

Election nung takok angutsü mechi kechiba BJP-i asaa tesempatem adoktsü politics asayar? Citizenship Amendment Act aser National Register of Citizens yagi tamangba yimsü nung ajemdaker telemsa adoktsü. Tesempatep o jembiba nung BJP-i shilem ahir aser yarir, aser tashi maitba kin anema azüdokshi mapa inyaker. Delhi, Manipur aser linük nung dang tesemtem nung azüdokshi aliba atema BJP ola madok timba alir, ta ashi.

Kechiba social justice indang tamendak dak raksatsüsa BJP sorkar inyaker? Tetsür, Dalits, SC, ST, OBCs aser minorities anema tashiyim amshiba nung kechiba BJP ola madoker. BJP-i kechiba caste census maginer? ta NPCC lenir-isa asüngdang.

Tesüiba kum tokü tsünga BJP-i asen Constitutional values

tashi maitba kumdaktsüogo. Opposition party aser lenirtem anema BJP-i mang-ayangba politics asayar. Nüburtemi shima aliba sorkar loksatsütsü atema BJP-i sen tashi amshir. Arunachal Pradesh, Goa, Karnataka, Madhya Pradesh Maharashtra aser Manipur nung sen tashi amshia election ajanga shimteta aliba inyakim raksatsüba ajanga BJP-i democracy akümsübobaba sayur. Investigative agency tem mashi lenmang nung amshir, aser 2014 km nungi tenzüka CBI aser ED ken o nung politician tem dena aliba shilem 95 bo Opposition lenirtem anema lir.

Makamaiter, nüngdakbapur aser tribal nisungtem indang budget ajemja tenokdangba ozüng balala yanglur. COVID-19 pandemic mapang linük nung makamaiter asoshi MNREGA aser National Food Security Act yagi tongtipang shilem agiaka BJP-i magizükteter aser UPA mapang yangluba tongtipang scheme tem aser MGNREGA amala Parliament nung parnoki mezüngmeshia amshi, ta sangdong ajanga ashi.

Advisor Abu Metha-i Nagaland Emporium semdang



CM Advisor aser IDAN Nagaland mendenbuba, Abu Metha-i New Delhi nung June 15 nü Nagaland Emporium semdangba mapang tangokba noksa nung angur.

Dimapur, Aami/June 15 (TYO): Chief Minister Advisor aser Investment & Development Authority of Nagaland mendenbuba, Abu Metha-i tanü New Delhi nung Nagaland Emporium semdangogo. Pa meina Deputy Resident Commissioner Wenyie Konyak aser sorkar ketdangsürtem oa liasü.

NHHDC nung Metha-i ketdangsür aser staff tem den sensak asem aser establishment inyangim aser tanga maparentem indang osang agia liasü. Staff patern indang report ka, establishment indang economics aser iba den scope aser tetsükdaktsütem indang NHHDC-i lemsatepa liasü.

Metha-i, Chief Minister Neiphiu Rio tawabangba kübok

state sorkari emporium ya lanurtem nem maongka agütsütsüla, ta ashi.

Metha-i, Nagaland nung ayongzüka agiba G20 aser B20 Meet ya takok tajung anguba rongnung ka liasü aser national aser international nungi shilem agirtem otsütsütsüsa aika adenshia kaogo, koba ajanga alima kintem dang Nagaland noksa tajung sayuogo, ta ashi.

Pai ashiba agi, G20 summit tatembangbuba ya linük yimtiba nung agitsü aser iba mapang alima kin balala lenirtemi State emporiums semdanga India tali tajungba angatetsü asoshi maongka angutsü. Anungji shirnoksa Nagaland Emporium-i ayaoka idir parnok ajak nem iba tesem bilemtetdaktsütsüsa inyangsangshitsü nüngdaker, ta Metha-i ashi.

state sorkari emporium ya lanurtem nem maongka agütsütsüla, ta ashi.

Metha-i, Nagaland nung ayongzüka agiba G20 aser B20 Meet ya takok tajung anguba rongnung ka liasü aser national aser international nungi shilem agirtem otsütsütsüsa aika adenshia kaogo, koba ajanga alima kintem dang Nagaland noksa tajung sayuogo, ta ashi.

Pai ashiba agi, G20 summit tatembangbuba ya linük yimtiba nung agitsü aser iba mapang alima kin balala lenirtemi State emporiums semdanga India tali tajungba angatetsü asoshi maongka angutsü. Anungji shirnoksa Nagaland Emporium-i ayaoka idir parnok ajak nem iba tesem bilemtetdaktsütsüsa inyangsangshitsü nüngdaker, ta Metha-i ashi.

Ao Kaketshir Mungdang-i sangdonger

Dimapur, Aami/June 15 (TYO): Ozü lokti nungi kaketshirtem adenba video tejen ka online sapang aser social media network tem nung prokshiba osangtem angazüker. Iba video nung adoker 'privacy' temeden nung aibelena temolung yiruja aser ano iba tatalokba ajanga asen kaketshir tentet ajunga tening menüksüba asoshi onoki süoki ia bilemer, ta Ao Kaketshir Mungdang (AKM) tir, Lanutoshi Aier aser

tongti zülur Satemmongba nati sangdong ka ajanga ashi.

Asen kin indang züngsem ajak akumtsüba, meranga inyaka yaritsü AKM tangatetba lir. Temelaba makai iba amala video prokshiba ajanga AKM tangatetba mechi-menentsür aser asen kaketshir asoshi timtem lir. Anungji onoki tim ketdangsürtem dang iba video prokshiba anendaktsütsü aser teraksa tali bener aruba nungi nokdangtsü asoshi tekeraba

nung mera agitsü akhanger, ta sangdong ajanga ashi.

Ketdangsürtem dang tekeratiba nung kanga junga bushisüngdang sür aibelener nem tapet ozüng kübok temerenshi agütsütsü mepishir.

Iba ken o tekeratiba nung aser temolung agüja mebenetra timtem tulu alitsü. Nisung kari danga iba video prokshiba putetra AKM office-i jaoka tapet temerenshi agütsüts, ta AKM sangdong ajangasa ashi.

14buba NHGSA General Session menogo



Dimapur, Aami/June 15 (TYO): 14buba Nagaland Home Guards Service Association (NHGSA) General Session, June 14 nü Central Training Institute nung agiogo.

Iba sentong nung Renchamo P. Kikon, IPS, Director General, Home Guards, Civil Defence & SDRF alakteta jaoker liasü.

Sentong nung o jembiba mapang pai, nüburtem atema bendanga agüja inyakba atema aser talisa nübu agi kanga ajema liaka lendong balala atalokba mapang nüburtem nem teyari tulu agütsüba atema department nem tenüngsang agüja liasü.

Züngsemtem dang iba lokti tentet aser department nung

densembra atema nüma adangtsü asoshi ajungshiba den pai Association-i nükjidong yur ibaji ataloktsü atema meranga inyaktsüla aser department nung temelenshi adokdaktsütsü atema sabang ka asütsüla ta ashi.

Mezüngbuba sentong ya I. Changsongla, Asst Finance Secretary, NHGSA lenisüba nung agi. NHGSA tir Smti Avinuo-i tir o jembiba mapang Association züngsemtem aser department-i tetsükdaktsü balala ajangshiba indang lemsatep.

Kasa mapang nung business session ya Vice President, NHGSA Ngongvai E. Phom lenisüba nung agia liasü. Sentong nungsa S. Rotokha Zhimomi,

Commandant, CTI-i o tatsüka jembiba mapang department-i taoba mapang ajangshibatem indang lemsatepa liasü.

Maneni Deputy Commandant General aser NHGSA Advisor, Shri Medozhalie Pienyu-i anküp o jembiba mapang pei tata mapang nung züngsemtem ajaki department asoshi takokba tashi inyangtsü koda tongtibatibang iba indang lemsatep. Paisa, ketdangsür balalai teyari agütsüba atema tenüngsang agütsüba den züngsem ajak dang department tejakdangi anir aotsü atema takokba tashi tajungtiba inyangtsü ayongzüka liasü.

Mon nung VT tem atema orientation training ka agiogo

Kohima, Aami/June 15 (TYO): June 14 nü Mon nung New India Literacy Programme (NILP) dak sendakba nung Volunteer Teachers (VTs) tem atema orientation training sentong ka ayongzüka katsüogo.

NILP ya 2022-23 nungi 2026-27 tashi küm pongu tsüngda benoktsü atema India sorkari amenokba sentong ka lir. Iba sentong yagi Foundational Literacy and Numeracy component kübok küm pongu tsüngda tangazüker crore 5 ayimjemtsü nükjidong lir.

Iba sentong kübok Foundational Literacy and Numeracy, Critical Life Skills, Vocational Skills Development, Basic Education aser Continuing Education ta nükjidong pongu lir.

Orientation training sentong nung tetushi tejaoker ama shilem agiba mapang Rongsenmenla SDO (C) Mon-i, renloka aoba lokti ka asoshi literacy jenjang ajungkettsü koda tongtibang iba indang lemsatepa liasü.

National Education Policy (NEP) 2020 den sendaktepa NILP benokba sülen VT temi

illiteracy raktoktsü atema takokba tashi teyari agütsütsüla, ta lai ashi.

Sentong nungsa Rokozeho Sothu, Nodal Officer, Directorate of School Education, Kohima, Nagaland-i ashiba agi, NILP nükjidongji 2030 tashi nungbo lisopur ajak literate kümdaktsütsü asoshi lir.

2011 Census nung Mon nung illiterate nisung 71,538 liasü. School education department nükjidongji Mon district nung nisung 38,394 bosa literate kümdaktsütsü asoshi lir, ta pai ashi. Iba dak sendakba nung pai VT-tem dang yimdam yimtsüng nung alirtem ayimjema inyangsangshitsü mepeshia liasü.

Iba sentong ya Lipshing Konyak, supervisor Adult Education (AE) lenisüba nung agi aser I. Moala Aier, District Education Officer Mon-i lokti pela agizükba o jembia liasü.

Sentong nung shisalen agütsürji Yankang Konyak aser Hengang Konyak na liasü.

Maneni W. Manyeih Konyak, supervisor AE-i tepela o jembi. Iba orientation training nung VT 100 dak temai shilem agia liasü.

Musicians Guild-i ayongzüka World Music Day amungtsü



Kohima, Aami/June 15 (TYO): June 21 nü 8buba World Music Day Naga Heritage, Old DC Bungalow, Kohima nung 5 ako nungi tenzüka amungtsü. Iba sentong nung Nagaland nungi kentenba telok aser artist 10-i shilem agitsü.

Kentenba teloktem rongnung Alobo Naga & the Band, Orange, Imliakum Aier & The Electric Cool Kid, Fifth Note, The Gluttones, Wishes & Dreams, K. L. Pamei, Azi Rudy, Renbeni Odyuo aser LG Sekhose densema lir.

Iba sentong nung shilem agitsü atema taa sen 100 dang asütsü, ta Musicians Guild tir Mele Pucho-i Symphony Café nung June 15 nü osangbenertem den sensaksemba mapang ashi. Iba sentong nung MG team nungi Mengu Suokhrie, Sanen Kichu aser Kevisa Khamo nungeria shilem agia liasü.

Pai ashiba agi, iba sentong ya kenten meimertem aser musicians tem longjema amungba anogo ka asütsü.

"Iba ya sentong ya balaka lir kechiyong sentong ya musicians aser artists temi self-sponsore asüba concert ka asütsü," ta pai ashiba den World Music Day concert ya Hornbill Music Fest dak alaka Nagaland nung concert tulutiba lir ta ashi.

Paisa, kentenba teloktemi parnoki mejemba ken densema ken asemsembosa atentsü ta metetdaktsü.

Iba sentong ya Symphony

Academy of Music, Kohima-achaayanga Elpis academy of music, Battleground unisex gym, 3E Nagaland, Galilee Music School, La Colline, 2K Hotel, Kros College, City Gym Kohima, Whito School, Disong Designs, Mon School of Music, Northern Sports, Synergy Enterprise, Medom's BNB, India Trail, Kohima Computer Centre, KABXI, Olive Spring, Artworks, Geisuo Sounds, NK Enterprise, Ét, Acoustic Wave, Alder Retreat, AK Events & IKO coffee Lodge nung den longjemer ayongzüka agitsü, ta pai ashi.

Pucho-i ashiba agi, concert ya nikongtsütsü 5:00 ako nungi tenzüksü, ajisüaka Heritage indang kishi 2:30 ako nung lapoktsütsü, kong 3:30 nungi tenzüka WMD Dance Battle, a one to one open style battle aser the "Battle of Best" sentong agitsü.

Iba tetoktepba nung kija mesüra telok balalai tsüngsangba nung shilem agitettsü aser tsüngsanger tajungtiba nem senpet agütsütsü.

Kasa mapang nung MG team züngsem Suokhrie-i ashiba agi, kentenba sentong dak alia chiyongtsü ayokdak aser osettsüt balala ayokdak amenoktsütsü. Iba dak sendakba nung lai kenten meimertem dang külem longjemer music day amungtsü atema arua shilem agitsü ayongzüka liasü.



Job Role : Nursing Care

Excellent Opportunity in HEALTHCARE SECTOR

Work in Japan and earn 1 Lakh + Overtime (as applicable) per month

Eligibility Criteria:

- Should be a domicile of North East India.
- Should be at least 20 years old.
- Should be either ANM or GNM or B.Sc. Nursing graduates.
- Freshers can also apply.
- Must be willing to learn Japanese language and work in Japan.

Employment benefits to the candidates:

- Attractive salary and allowances with long-term employment.
- Overtime for additional income.
- Flight tickets from India to Japan.
- Support to candidates in Japan.
- Good and secure working environment.

This program is for candidates who have their family income less than 7 Lakhs INR per annum.

Last date for submission of application: 30 June, 2023
Admission Interviews to start from: 1 July, 2023
Course for new students to start from: 15 July, 2023

Limited seats available.

The enrolled candidates will undergo sponsored full time residential Japanese language training and other nursing inputs for 9 months in Gurugram. Upon passing the exams and interview, they will be placed in Japan. The candidates will also be supported in boarding and lodging during the training.

This program is sponsored by the **North Eastern Council (NEC)**, under the **Ministry of DoNER**.

Specified Skilled Worker' (SSW):
 Government of India and Government of Japan have signed a Memorandum of Cooperation to promote SSW. SSW is a new residency status which allows Indian candidates to work in Japan for long term.

Opportunity:
 Japan has a high demand for Nursing Care (Care Workers) candidates to work in Japanese elderly care facilities, hospitals, and other recognized health care institutions.

Scan QR code for registration

You can also apply through the URL below:
<https://forms.office.com/r/WammFe4SKQ>
 or call/WhatsApp at: +91 78078 53829

Karnataka nung Congress sorkari anti-conversion ozüng agientsü

Bengaluru, June 15
 (Agencies): Karnataka nung Congress sorkari taoba mapang BJP sorkari benokba anti-conversion ozüng agientsü atema telemtetba agiogo.

Taruba assembly senden nung anti-conversion ozüng agientsü atema sorkari bill ka benoktsü; state legislative assembly July 3 nungi tenzüksü.

Cabinet senden amenba sülen osangbenertem den jembidang Law & Parliamentary Affairs Minister, H K Patil-i, "Cabinet senden nung anti-conversion bill atema o lemtepogo. 2022 küm parnoki (BJP sorkar) benokba ozüngtem melenshitsu atema onoki bill ka agizükogo. July 3 nungi senden tenzükdang onoki iba bill benoktsü," ta metetdaksü.

Karnataka nung benokba Anti-conversion Bill dang Karnataka Protection of Right to Freedom of Religion Bill, 2021 ajar, aser iba ozüng ya 2021 küm December ita nung Karnataka Legislative Assembly nung agizüka liasü. Tashiyim amshia mesüra mesüzüka tamangba yimsü meyipdaksüba nokdangtsü nükjidong nung taoba sorkari iba ozüng benoka liasü.

Taoba sorkari iba bill benokdang Congress lenirtem den tanga opposition party temibo iba ozüng anema nokdak. Iba ozüng kübok aibelenertem küm 3 nungi küm 10 tashi tepuokdak ayutsü aser senchi 50,000 tashi achitsü.

Karnataka nung iba ozüng benokba sülen iba ozüng kübok mezüng Muslim nunger, Syed Moyin apu. Syed-i tetsür ka den ajen aser tetsür Ijari Islam yimsü dangi meyipdakja liasü.

State assembly elections jaddang Congress manifesto nung school textbooks nung temelenshi benoktsü aser National Education Policy (NEP) agientsü, ta nangzüka liasü.

Brihostibarnü cabinet senden nungsa class 6-10 purtem Kannada aser Social Science textbooks melenshitsu aser RSS tentetsang Keshav Baliram Hedgewar den Hindutva lenir, V D Savarkar na densema nisung kar indang chapters agientsü telemtetba agi.

Cabinet-isa school textbooks nung Savitribai Phule, Nehru-i Indira Gandhi dangi züluba shidi aser BR Ambedkar sangrottem indang chapters züngoktsü telemtetba agiogo.



June 15, 2023 nü cyclone Biparjoy-i Gujarat tzyüimkümlen kongshitsu lia CNDRF sepaitemi tzyüimkümlen alirtem aser ali nemzüka alidak alirtem shelter homes-i anir aotsü achayangba noksa nung angur.

Ukraine-i PM Modi nem global peace summit nung shilem agidaksüner

New Delhi, June 15
 (Agencies): Taoba ita Ato kilonser, Narendra Modi-i Ukraine Tir, Volodymyr Zelenskyy den senden amenba sülen Tir den inyaksemer, Andriy Yermak-i phone ajanga National Security Advisor (NSA), Ajit Doval dang, 'Ukraine Peace Formula' atema India nem yaridaksüner, ta mepishia liasü.

Ukraine nung rara anentsü atema yaküm Ukraine Tiri onük 10 benoka liasü, aser iba dangji 'Ukraine Peace Formula' ta ajar.

Yermak-isa taküm July ita nung agitsü ayongzükba global peace summit nung Ukraine-i Ato kilonser, Narendra Modi nem shilem agidaksüner, ta metetdaksü.

Ukraine-i iba senden nung Global South nung aliba

linüktem densema akokba tashi linük aika nem shilem agidaksüner, ta Yermak-i metetdaksü.

"Tawa tatalokbatem ajanga, Ukraine aser alima atema Ukrainian Peace Formula ya tang tensa atema kanga tapet, ta kuli sayuogo. Iba formula mapa kuma inyaktsü atema onoki partners den senteper Global Summit ayongzüka renemer. Iba nungji India-ia shilem agitsü onoki imlar," ta Yermak-i metetdaksü.

May 20 nü Japan nung G20 senden aliba mapang nung Ukraine Tir Volodymyr Zelenskyy aser India Ato kilonser Narendra Modi na jurila senden amendang amelitepa inyaktsü atema tenati bangjemba ama mapa kuma inyaktsü imlar, ta paisa

metetdaksü.

"Tena senden amenba mapang nung tongtibangtiba onükji Ukrainian Peace Formula liasü. Yimjung atema Ukraine nunger sentongji alima linüktem nem nungitdaksünser aser iba nungji India nem-a shilem agidaksüner," ta Tir office sangdong ka ajanga metetdaksü.

Tena senden amendang Zelenskyy-i Modi dang Ukrainian Peace Formula nungitsü mepishia liasü. G20 Bali Summit nung Zelensky-i Ukrainian Peace Formula ya sangdong.

Yermak-isa tang Ukraine tensa aser Russia-i missile den drones amshia Ukrainian yimitem aser civilians amakba osang Ajit Doval nem metetdakja liasü.



June 15, 2023 nü Uttarkashi district nung curfew ozüng benokba sülen Purola nung security sepaitem adenshia aliba noksa nung angur. 'Love jihad' anema senden tuluka ayongzüka aliba nokdangtsü nükjidong nung ketdangsertemi CrPc kübok section 144 ozüng benok.

2024 küm opposition melongjemra joko election magitsüa akok: AAP

New Delhi, Aami/June 15
 (Agencies): 2024 küm Lok Sabha election nung opposition party tem melongjemetra joko asen linük nung election kodanga ayongzüka magitsüa akok, ta Brihostibarnü AAP-i metetdaksü.

New Delhi nung osangbenertem den jembidang AAP otongdar aser cabinet minister, Saurabh Bharadwaj-i, 2024 küm nunga maneni Narendra Modi Ato kilonser shimra pai linük temzüng melenshitsu akok, aser pa taküm ali tashi pa chuba asütsü, ta sangdongtsü akok, ta ashi.

June 23 nü Patna nung ayongzükba opposition party tem senden nung AAP onükji kechi asütsü?, ta asüngdangba langzüdang Bharadwaj-i, "Opposition party tem longjemer merarara (2024 elections nung) joko tarutsü nungbo linük nung election kata magitsüa akok," ta ashi.

Paisa, "CBI, ED aser IT-i opposition party balala nungi lenirtem anema mita aoba yimya aser tepuokdak ayuba tensa apir, Narendra Modi ano maneni 2024 küm Ato kilonser kümra pai linük temzüng

melenshitsu akok aser pa taküm ali tashi linük nung pa chuba asütsü, ta sangdongtsü akok. Yamaji süra, nisung mezüngdangteti taküm tenla agüja anguba linük nüchiso ya samaadoktsü," ta metetdaksü.

June 23 nü Bihar chief minister Nitish Kumar-i ayongzükba opposition party tem senden ya sangküm Lok Sabha election atema opposition longjemettsü nükjidong nung ayongzük.

Bihar yimtiba, Patna nung ayongzükba senden nungji Congress lenir Rahul Gandhi, Delhi Chief Minister Arvind Kejriwal, West Bengal Chief Minister Mamata Banerjee aser Congress Tir Mallikarjun Kharge nunger densema opposition party balala nungi lenirtem aika adentsü.

Kasa senden nungji Samajwadi Party Tir Akhilesh Yadav, Jharkhand Chief Minister Hemant Soren, taoba mapang Maharashtra nung Chief Minister Uddhav Thackeray, NCP Tir Sharad Pawar, Tamil Nadu Chief Minister MK Stalin, CPI General Secretary D Raja aser JDU Tir Lalan Singh nungera adentsü jangjaogo.



TIR YIMYIM YIMOBILEM (EDITORIAL)

DIMAPUR ROGONÜ, AAMI (JUNE) 16, 2023

Ochimashi azü nung jajar !

Linük nung BJP teloki aniba government küm tuku ajungba anogomung nung osangbener den jembidang, BJP lenir Dr.Dilip Kumar Jaiswal-i Nagaland nung ochimashi inyakba mapa ya cancer tashidak amato kanga mejungi kümogo aser ochimashi ya Nagaland nung officers, engineers aser contractors azü nung jajar ta metetdaksübaji, Nagaland asoshi osang tasen aser tajung-tazübo masü saka asenok ajak atema azü melentsü ajungshiba temeim o ka asütsü. Nagaland nung dang masü saka India tasüng ochimashi mapa inyakba anogo shia asenoki angashir. Talisa asen kidanger Assam nungbo anogo shia government nung ketdangsertemi ochimashi mapa inyakba puteta Vigilance aser Anti-Corruption nung inyakertemi apuba angur. Ajisüaka, item ochimashirtem o asenok ochimashirtem na tsüngda ochimashi mapasa asüyonga tetsüngda talangka lia asangtetsüa akok, kechiyong tangar dakjibo ochimashi ya azü nungbo malitsüa akok saka asenokbo azü nung jajar ta tangari dena shitetbaji kanga tekümdangtsü mapa ka asütsü. Ano, asenok nem angatetdaksütsü atema kasa BJP lenirisa ashiba agi Nagaland nung Officers, Engineers aser Contractortem ya, yi lar aser mozü lar kumadokba ama, ochimashi lar kumadokogo, anungji parnok melenshitsuübaji mapang agitsü. Atangji, BJP teloki yimsü asüba state nung BJP leniri jembir asünungji, Nagaland nung government tenzükertem dakji alaka ano yimten yimsüsürtem daka azü nung kasa ochimashi züji jajar asü mejajar ajibo pai memetetdaksü, anungji tendang nung dang metettsü. Ibai asenok taküm Tsüngrem dak amangertem dang süngyanglu külemer kati ashiba tarütsü aser tajungshi o tajung ka asütsü. O tesepra asünungji asenokibo manganütsüa akok saka asenoki asensasa asenoki inyakba mapatem meteta lir, anungji asenoka melenshidi süra asen jakla nung ochimashi zü keta alibaji ochiba zü agi melentsüla. Joko, Nagaland government nung ochimashi mapatem jateta adoker aser Nagaland tilaka nung ya ochimashi masemer. Ibayongji, Nagaland government nung tongti tenzükertem nisung 17 tashi ochimashi inyakba maparen nung CBI aser Enforcement Directorate purtemi bushisüngdang tesüdak lir ta BJP leniri metetdaksüba osangji asenok atema konangbo masü. Nagaland government nung nübortem asoshi terenlok sentong yanglurtemi yangluba sentong tulu aser tajungtemji center government-i agizüker aser mapa tenzüksü asoshi sen agütsür saka iba sen endoka inyakba osang (Utilisation Certificate) kodanga meyipa marur ta BJP leniri ashiba nungji asenok azü nung ochimashi jajaba meteter. Azü nung jajar asünungji koda sütsü, government nung lenir aser ketdangsertemi nübortem asoshi terenlok mapatem atema Delhi nungi yokba senji pei lu ayimtsü, pei lenmang yanglutsü aser pei ki asütsü atema yok amai bilemer. Ashiko, iba ama ochimashi mapatem ya ketdangsertemi inyaknüseta inyaker masü saka BJP leniri ashiba amaji, asenok joko ochimashiba lar (addicted to corruption) kumadoker, asen shi aser azü ajak ochimashi agi asünungji, aseni inyakba mapa ajak ochimashi mapa kumadoker asütsüa akok. Aji oda, joko asenok azü ia adok nungji, ochimashi sen tilaka dena soruchiok mesüra chi mananger, ochimashi sen agi yangluba ki nungang jangratema nümadangdanga alir aser ochimashi sen agi azüngba degree aser mapa bener Tsüngrem nung sanga alir. Ibaji tapi agi masü saka azü nung ochimashi jajaba agi lir. Iba ochimashi zü jagi asenok alar kumadaksür aser asen temang aser tezü nung taaktsü zü kenyongi mali kuma samadaksür. Iba ochimashiba zü asen temang nung ali tashi tanü asenok anema liaka asüng asen chirnurtem shirangtsü. Iba ochimashi zü ali tashi asenoki tapu aika jembia ka Nagaland nung asenoki kilentzua junga meyanglutettsü, yimdong nung light yindong kata memesotettsü, asen lima nung akaba kaketreju aser taneptsü angudak ajak tagidak makaba tesem kuma aotsü, anungji alarbo alarsa asütsü. Asenok taintembo ojang, saka asüng ser yanü asen chirnurtem iba ama alar tia nung lia moudaktsünüra asenok dak jajaba ochimashi zü ya ajak melenadoktsüla. Atangji, ochimashiba zü yabo tangari masü saka peisasa dang melener.

OLEMSABANG

YI AJEMBA TAJANGZÜK ANGUBA ASER TERAKSA ADOKDAKTSÜBA INDANG TATSÜKA LEMSATEPER

~ R. Imkong Lkr, Aolijen Mepu (Unmga)
Mokokchung

(Yashi adok nungi...)

Tanabuba nung ano yisa asüyongbo Mapokjang agi yangluba (sticky rice beer) yi yabo khen agi balaka tanang ser menamenar tesashi asünungji aikati iba piya chi aser yi-ji kanga sapua chia jemasa aru ta jembir, aser iba chi aser yi jagi melamela leta mesüpadoker tasa jembia aru. Ni bilem nung tanü asüng kari mapok yi-ji yanglua ayok nungbo bottle ka sünga nung merijang ka tema jenjang agiang angutsü alitsü südi ta bilemer. Tanabuba nung iba kasa yi yangluba tu tsüngküm mapang nungbo (winter season) anogo terok nungi tenet tashi nungang terunem tajung tu adoka alir, idangji piya chi tu agiteta lalok (a kind of big filter made from bamboo fibre) ka nung enoktsü aser iba nungji tzü talem shioka ajepsar ajemer, iba jagi asen temang lemlema kümdaktsür. Iba kasa yi tangji English oshi agi (local brew) ta ajar, aser iba yi ya Moatsü aser Tsüngremmong benjung mapang nung talupusa amshia ajemer. Saka tanübo Khrista yimsü aru kelen iba yiji Khirstanpurtemibo majemer, sakasa nisung ajak kasa masüji tenüng agi tang khristan ta ajaba karbo lir asünungji item jagibo yi tajungla mesüra tamajungla ajak jema alitsü akok.

Tanga lima India tesem balala nung aser foreign limatem nungbo yi mozü tapu balala amshia yangluba yitem aika angutsü. Tatishtsü agi XXX Rum, Whisky, Brandy aser ano tanga yitem tapu aika angutsü. Aser ano English nungertemi kanga sapua amshiba yi tapu ka lir, koba dang 'Vodka' ta ajar, iba yi jagibo shi temang ajonga tasü ama tang kümdakja aleter ta ashir. Iba yi tesashiji mezüngbo Russia lima nung adoka yanglu ta ashir, saka tesülen iba yiji alima tesem aika nung prokshia yangluteta jema aru ta otsü angazüker. Tanü India lima nung yangluba 'XXX Rum' yabo tesashi ser tera tako ta ashir, 'bitter taste' iba yi yagibo temang dena raksatsür ta ashir, saka iba yi ya teti ajemertemibo joko iba yi dak alaka tanga yibo mejemner ta sa jembia angazüker. Iba XXX Rum tetezüji regular used medicine ta karibo ashir aser jembir. Saka iba tesashi yi ya mozü ama teti dang jema lira tebok telong ajonga kanga mejungi raksatsür, tetezü rongsatsür aser tatem nungbo iba yi yagi leperi anir air ta metetdi. Aji oda iba yi ya jema jemabo pei sasa iba chiyungtsü achiba aser ajemba jagi pei tkaüm arishi tembangtsü ta metetsümonga mejemibo amoi-a moteter ta sa jembia angazüker. Yamaji yi teti jema alirtem tu mapang kabo joko kodakang mesüi akümer, aser tatem nungbo pei-i bushiba leper jagi aitsüsa akümer ta metetdi.

Teti agi yi jemer ka yimyaji yamai tang alir, oda parnok meimer kati yamai ashir, na tang nungibo yi tejem, ajita mesüra ne taküm ya yakta tang arishi tembanga doktsü ta shira, yi jemsang jagi meyiper yamaisa langzür, onok yi ajemba ya ne sen agi ajemer masüa koti, anungji ne bangji khen agi terakshi ta langzüba angashidang pei mulung nung yamaisa bilema aiter, oda temeshi Lai nung ak matsüngdang senti berem tentok ta shia aliba tu item amala dang ashirba atu ta sa bilema aita alitsü ta amanger. Saka mapang talangka maotang yi jemsang tu kanga mejungi shirangdar ta angazüker, aser iba osang tu angashir par kidang jagi odang nung shirangsangi pa semdangi aruba ngua tenük nungi memeteti ka nüktzü yimzuka aluba angur, idangji pa semdangi arusang jagi ashir, oda nia kechianga meshika ta shir oadoker. Saka mapang tatsüka tang lirbo shirangsang tu süadokogo ta osang angazüker. Yamaji yi jemertemi pa junga aliba anogotem nungbo ngangangatema, asüküma, tiyaksanga o tamajung aikasa jembiba tu tatem nungbo tia tamajung agi pa mesüra la taküm arishi tembangtsüsa mapang donga arur.

Aser ano mapang ka nung yi jemer kati kar dang yamai ashir, alima nung asenok taküm ya khen tang alitsü, aserbo khen tang asütsüji kechi aliaka ta ngangangadema mezümeküma jembir. Saka mapang talangka maodang pa dak tashidak tamajung ka agi atonger aser kanga kangshia timatemer, idangji pai ashir, hai tembartem aser kinungertemni tangbo mesüneraja! Ta jeba ayimtener, idangjiibo kinunger rongnung kati yamai ashir, pa ya taküm junga aliba anogo nung tu alima nung khen tang alitsü aserbo süadoktsüji kechi aliaka ta ashiba tu tanübo süadoktsü yamai tsübur no? ta asaloktsür. Idangji kinungertemi ashir, asenoki pa ya repranga lia odang südaktsütsü masüji ta sür parnok indang kimong lumong aser ki tajung ka süa akaba tu kar dang yoktoker, aser iba sen jagi pa tu hospital tajung kar bushia anir oagi Doctor aser Nursetem ajurua pa temang anepalu südang, saka mapang tatsüka tang lirbo pa temang tamajungba tang kümer taküm arishi tembanger. Aji oda yi jemer ka takümji yamaji tembanger ta asenok akümlirtemi angatettsüla ta asüba olenka ka shisemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger agateta agitsü mepishir

Kenya nung pastor tetuyuba nung lumia asürtem 303 jungogo



June 12, 2023 nü Kenya nung Kilifi County kübok Shakahola arem nung Directorate of Criminal Investigations (DCI) nungi ketdangsertemi tasü mang tutetdang tangokba noksa nung angur.

Nairobi, June 15, 2023

(Agencies): Kenya linük nung Khristantem lumia asürtem 303 jungogo; Hombarnüa ketdangsertemi ali nungi tasü mang aika tutetogo.

Ketdangsertemi ashiba agi, asürtemji pastor Paul Mackenzie-i aniba Good News International Church nungi züngsemtem liasü.

Pastor Paul-i pa sülen anidakertem aser parnok chirnurtem dang, alima tatembang matongdang kodaki aotsü atema nenoki lumia süadoktsüla, ta tuyuba atema pa anema ken o benoka lir.

Kenya nung Kilifi County kübok Shakahola arem nung ano tasü mang 19 ali nung tutetogo aser ibaji densemabo tang tashi nung nisung 303 asüba jangjaogo. Iba dak alia nisung 600 dak tema samar mangur, ta regional official Rhoda Onyancha-i

metetdaksü.

Taoba hopta Directorate of Criminal Investigations (DCI) nungi bushisü ngdangertemi iba region nung ano tesem tuluba atemzuka tasü mang bushi tenzuka liasü.

Pastor sülen anidaker nisung 65 Hombarnü (June 12) puogo, kechiyong parnoki June 6 nungi lumiseta asütsü merang aser chiyungtsü achitsü memelungi liasü.

Taoba ita Interior Minister, Kithure Kindiki-i, Paul Mackenzie sülen anidakertem aikati chiyungtsü memelunger, aser iba atemaji tebilemtsü akar, ta metetdakja liasü.

April ita nung Paul Mackenzie puogo aser pai bail nung chioktsü mepishi saka magizük.

Taküm küm tetenzüklen-a tanur ana lumiseta süadoktsüba atema temelung melemi Paul pua liasü saka mapang tatsüka

dang lirbo chiok.

Pa chiokba sülen pa tanaben Shakahola aremi ao. Iba sülen par Arogo züngsemtem dang, alima tatembang mapangji August ita nungi April 15 tashi asütsü, ta shia alima tatembang marudang kodaki aotsü atema lumiseta asütsü ajungshia liasü.

Kenya linük nung Khristantem lumia sarasadem dang asüba tatalokba dak sendakba nungsa April ita nung televangelist kata apu. Mavueni jila nung Pastor Odero indang New Life Prayer Centre aser Tenla kidang nisung aika aliba ketdangsertemi kümzükogo, ta minister Kithure Kindiki-i twitter ajanga metetdakja liasü.

Mavueni jila ya Shakahola arem nungi kilometer 66 shi pilar lir. Iba arem nung pastor, Paul-i pa sülen anidakertem dang, lumiseta asüba ajanga nenok tama kodaki aotsü, ta ashi.


Georgia nung pastor Dr. Michael Catt alima nungi pilaogo

June 15, 2023: Mapang talangka Arogo tuluka nung pastor inyaksang, Dr. Michael Catt arrshi küm 70 lia alima nungi pilaogo.

Albany, Georgia nung aliba Sherwood Baptist Church nung pa (Catt) 1989 nungi 2021 küm tashi pastor inyaka liasü, ta Hombarnü Arogoi Twitter ajanga metetdaksü.

"Küm 31 tashi Sherwood Arogo nung sannükba mapa inyaksang aser Arogo nung pastor 5buba Dr. Michael C. Catt asüba osang angashia Arogo jashir. Catt'er kibong aser Michael'er medemertem atema sarasademtsüba nung onok den külemi shilem agidaktsüner," ta Arogoi mepishia metetdaksü.

Catt'er jala, Hayley-i social media ajanga tebu asüpila sentong agitsü aliba osang metetdaksü. Asüpila sentongji taruba Mongolbarnü (June 20) Sherwood Baptist Arogo nung agitsü; June 20 nü akhüm agütsünertemi Atrium nung anepdang 10 ako nungi 12:30 ako tsü ngda akhüm agütsütsü akok, iba sülen nikongdang 1:30 ako nung tatembangbuba



Dr. Michael Catt

asüpila sentong agitsü, ta par jalai metetdaksü.

Catt'er kinüngertemi pastor indang twitter account ajanga pa hospital kati anir aotsü saka prostate cancer atemabo joko treatment magitsü, ta sangdongba sülen hopta asem shi lir pa alima nungi pilaogo.

Pa küm 30 dak tema Sherwood Baptist Church nung pastor inyakba dak alia pai Sherwood Pictures tenteta Khristan film aika produce süogo.

Catt indang website nung yamai shia lir, "Arogo nung pastor ka ama Michael nükjidongji Georgia kübok yimtsüngtem nungi tenzuka alima nung temelenshi

adokdaksütsü liasü."

Pastor Catt ya Khristan film aika nunga executive producer liasü aser item film rongnung "Facing the Giants," "Fireproof" aser "Courageous" densema lir.

Sherwood Baptist Church nung züngsem aser Kendrick Brothers video ministry nung director, Michael Kendrick-i Instagram post ka ajanga, "Michael Catt den külemi inyaksemdang atalokba temenungratsü aika lir, aser iba atemaji onoki Tsüngrem nem tenü ngsang agütsür. Tsüngremi par kibong sünepjang aser maneni len aniang ta sarasademtsür. Küm 20 dak tema par kibong den külemi lisema aruogo. Kibuba tenü ng sangang," ta lemsatop.

Michael Kendrick adianu, Stephen Kendrick-ia, "Tsüngrem lar tanü Kibuba den alitsü ogo. Pa ya ainkar ka, pastor ka, shisa taka counselor ka aser ozü kibong atema tembar tajung ka liasü. Nai junga inyakogo Michael. Onoki na meimer," ta lemsatop.

Catt-i pa kinüngtsü, Terri den jala ana Erin aser Hayley nungertoktsür pilar.

ANOGO ABEN TSÜNGREM DEN

Kechiba Tsüngrem Mekorai Alir?

T. Ken 109:1-13

Kodang kotak mekorai lidir nai kechi inyaksü? Kodang Tsüngremi ne tayimtenba mangashilir aser telangzüba mengulir mesüra nai angashitsü mekokra nai kechi inyaksü? Dawid taküm nunga ibai atalok. Pai Tsüngrem dang maneni ayimten, "Ni asangba Tsüngrem, nai mekorai telima" (T.Ken 1). Dawid tamajungeri arishi- pa taküm nung maneni atalok. Kodang pai tekong 13 nung sarasadembaji sarasadem, pai kija dak mang ayangtsü mebushi. Masü, pai Israel madak Tsüngremer chuba ka ama pai sarasadem. Dawidi tamajunger o bendangbaji ngunü kechiaser parnoki Tsüngrem nübur amak, shiba nungi Tsüngremer O aser par chir adoktsüba liasü.

Kechi mapang nung Tsüngrem mekorai alir? Ibai aseni mangashir asütsü akok mesüra aseni manganüba asütsü akok. Evangelist Billy Sundayi iba o ya amshia ashi, ozü ng nung aibelener kati police angutsü makokba ama temenen nisung kati Tsüngrem angutsü makoker. Pai mebushir. Temeneni asenok Tsüngrem tsütsü tenarong tajak kümdaktsür. Kodang Adam aser Eva nati Eden tsüki nung Tsüngrem ola angashi, parnoki ajen aser atsüka ali. Tanurtemi kodang tashi mangalir yamaji inyaker.

Asenoki osangji asoshi renema malidang Tsüngrem mekorai alir. Pai langka asoshi asenok den jembiner saka asenoki renema malir. Asenok renema alitsü asoshi tetendangba ajanga aotsüla aser angatsü renema alitsüla.

Tsüngremi ken ken mekorai alir, kechiaser asenoki mangatsü ta Pai metet. Pai mulungba sayutsü Pa teti renema lir saka shirnoki mulunga alir parnok dang dang Pai pa mulungba sayur. Yohan 7:17 nung Yisui ashi, "Kari Pai mulungba inyaknürä, Pai sayuba indang angatetsü." Tashi angaba nüburi teti Tsüngrem ola angashir.

Tatamsa, asenok tendangtsü Tsüngremi ken ken mekorai alir- mekorai tongtipangji sayutsü atema Pa dang ataa alibaji tongtipang lir. Ataa aliba jagi Tsüngremji Tematiba ta bilemtetdaksüba nung yarir.

Tsüngrem mekorai alibaji tamang tendangba nung tasaktiba lir. Pa mekorai alidang nai kechi inyaksüla? Pa mulung lemtetba aser tesüba temoatsütem bilemtetsüla. Pai ne dang tesüba nung kechi ashi iba nung tanü liang. Pa dak amangang aser ataang. Nai tanaben Tsüngrem ola angashitsü.

Benue state nung Fulani teloki Khristan 46 tepset

Abuja, June 15, 2023

(Agencies): June 3-4 anogotem nung Nigeria nung Benue state kübok yimtsüng balala nung Fulani Muslim teloki Khristan 46 tepstogo.

June 3 anepdang zü ngia Fulani teloki Imande Mbakange yimtsüng amakdang Khristan 28 tepset, ta Shitile Development Association-i metetdaksü.

Iba sangdong nungji SDATir Samuel Door aser Secretary, Ephraim Zuai nati sign süa lir.

June 4 nüa Fulani teloki Khristan 18 tepset; Michihe, Achamegh aser Mbagene Kpav yimtsüngtem shia nung Khristan trokrok (6) tepset, ta parnoki metetdaksü.

"Anogo ana tsü ngda kiralongrartemi ozü yimtsüngtem amakdang Khristan 46 tepsetogo. Tejashitsü kaji, tamakertemji security agencies aser Nigeria sorkari meteta dang lir saka parnok nokdangtsü atema

parnoki kecha meinyaker," ta SDA-i metetdaksü.

Yimtsüngtem amakdang nisung aikati pei ki aser alu toktsür jenshiogo, ta parnoki metetdaksü.

"Ozü nüburtem jena aoba sülen Fulani teloki item tesem atsü ng a gir aser alu nung parnok meyong kiset shiruru chiyimdaktsür. Tetsüba ajanga yimtsüng ka nungi ka tsü ngda senzütsü kanga tasak, ibayongji osang tejangja memeteter. Parnoki yimtsüng aika amaker aser tesem aika nung mangyimtepdar," ta parnokisa metetdaksü.

2022 küm alima nung Khristantem teimtiba tepsetba linükji Nigeria liasü (Khristan 5,014 tepset), ta Open Doors' 2023 World Watch List (WWL) report ajanga metetdaksüogo.

Alima nung Khristantem alitsü linük tamajungtiba 50 rongnung tang Nigeria ya jenjang 6buba nung lir.

Greece rong lendong nung nisung 78 asü, aika samar bushir



Athens, Aami/June 15 (Agencies): Greece south tsütsü ango apuba rong ka mükepoka sülen nisung 78 süogo aser 100 dak tema kumzüka lir.

Saka takum kumzüker temi ashiba agi, iba rong nung nisung 750 liasü aser item rongnung tanur 100 liasü.

Ibai migrant tem asoshi lendong tulutiba rongnung ka alitsü, ta Greece-i ashir aser anogo asem mang ayimtsü sangdong.

Ketdangsur temi ashiba agi, parnoki teyari agütsüba magizüker saka yaritsü atema mapa peria meinyaker ta aitsür.

Rong ya Pylos indang south-west tsütsü mile 50 shi pilar Bodhbarnep 2:40 ako meta tzüyim telungi alu, ta Greek coastguard temi ashir.

EU indang border agency Frontex ajanga ashiba agi, parnoki Mongulbar nikongdang rong ka angu aser idangjisa Greek aser Italian ketdangsur nem osang agütsü. Coastguard temi ashiba agi rong nung alir kata life jackets sema meliasü.

Coastguard temi ashiba agi, parnoki ango apuba rong den nikongdang 14:00 ako meta osang agitep aser parnoki teyari kecha memeshi.

Greek shipping ministry ajanga iba rong den aiben jembi aser jembi shia parnok Italy-i oner ta dang langzü. Maltese nisan songa aliba rong ka ajanga nikongdang 6:00 ako meta chiyongtsü aser tajemtsü tzü agütsü aser ano ghonda asem sülen rong kati tajemtsü tzü agüja liasü, ta Greek coastguard temi ashir.

Iba sülen Bodhbarnep 1:40 ako meta iba rong nung alir kari Greek coastguard dang rong indang gol-i mapa meinyaker ta osang agütsü.

Iba sülen manga tatsüka tsüngta rong ya meküpok aser minute 10 nungi 15 tsüngta tzü telungi alu. Iba sülen timtem ajurua alir bushia kumzüksü maparen tenzüik saka mopung tesashi aonba ajanga tetsükdaktsü ajurua liasü.

Tzüyim nung migrant tem atema emergency helpline, Alarm Phone ajanga ashiba agi, rong ya ghonda aika timtem nung lir ta coastguard temi metetaka teyari magütsü aser ketdangsur nem osang danga kar ajanga rong timtem nung aliba indang metetdaktsü.

Rong nung alirtemi Greek ketdangsur ajurutsü tsüboa liasü südi, kechiaser linük ketdangsur temi rong meyipa yokba parnoki meteta lir, ta Alarm Phone

ajanga ashi.

Médecins Sans Frontières nungi Jérôme Tubiana-i French radio dang ashiba agi, European aser Greek ketdangsur temi mezüng yongi langka inyaker alitsüla liasü. "Frontex rong anasai oaka iba rong nungi teyari magizüka ajanga kecha meinyak yutsüba ya tesüngmangtsüka lir... nisung tali mena aliba rongji timtem nung aliba rong lir."

Iba rong ya Libya nungi Italy leni aorba liasü südi ta amanger, aser rong nung mena alirtem ya timba arishi küm 20 tsüngta teburtem liasü südi ta amanger.

Iba rong ya anogo ishikabo jajarba liasü aser Mongulbar nikongdang Maltese nung khu abenba rong kati ajurua parnok nem chiyongtsü aser tzü agütsü, ta osang ajanga ashir.

Iba lendong nungi takum kumzüker temi rong nung nisung 500 nungu 750 tashi mena liasü ta ashir. Coastguard Cpt Nikolaos Alexiou-i ashiba agi rong ya Mediterranean tzüyim nung taroktiba tesem ka nung mükepok.

Tang tashi iba lendong nung asü-amartem linük tenüng mesangdongi lir.

Ozüng alema nisung shibelenertem südi ta temolung melemi aliba nisung asem Kalamata nung central port authority dangi anir oa asüngdangya asü.

Greek Tir Katerina Sakellaropoulou-i iba lendong nungi kumzüka alirtem kar semdanga tzü nung arakseta asürtem asoshi tejashi lemsatep.

Küm shia Mediterranean ajangtsü merangdang nisung noklang aika asür. February ita migrants tem mena aliba rong ka southern Italy kübok Calabria region nung Cutro anasa mükepoka nisung 94 asü.

Shibelener nem sen agütsüteter kisüng masü saka shidakba nung teyari aginüa aliba nisungtem agizüksü asoshi EU migration policy tejanga yanglutsü Greece-i aiben jembia arur, ta Greek migration ministry ketdangsur Yiorgos Michaelidis-i ashi.

"Tangbo Europe-i arutsü atema shibelener temi lemteter."

"Nüngdakbapur nem asylum, teyari agütsütsü aser kumzüka ayutsü EU khuret lir. Ibai Greece, Italy mesüra Cyprus tebilemstü masü. Migration policy yanglutsü EU dak keta lir," ta ashi.

Middle East, Asia aser Africa nungi refugee aser migrant tem Europe linük temi aruba mapang Greece ya lenmang tongtipang rongnung ka lir.

Taküm refugee aser migrants 70,000 dak tema Europe linüktem tonga aruogo aser timba Italy nung anen, ta UN data ajanga sayur.

MOLUNGNEN O

"Tsüngrem asen jenokdak aser tashi, timtem nung anasatiba teyarir." T. Ken 46: 1



Asür Onenlemla (Chuchuyimlang)
01/03/1933 - 09/06/2023

Onoki teti meima aliba ojala asür Onenlemla tasüba anogo mangyim jashi alidang, kinungertem, tembartem, lokti balala shirnokisa nubo, rongsen, shisatsü aser sarasadem agi onok den yaritepogo, nenok ajak dang kangasa pelaba lemsateper.

Aser nenok temeim onoki kodanga mamadoktsü. Asen teyanglur Tsüngremi nenok tali moajangma ta onok sarasadem.

~Temeim chirnurtem, semchirtem aser kinungertem.

MULUNGNEN O



Pai meimba asür **Mr. R. L. Jamir** asoshi aseni sarasademba Tsüngremi langzüogo, shiba 09.06.2023 nü timtem makai asü.

Onoki teti meima alisang onok nungi pilaba mapang temeim, sarasadem aser teyari talobusa moatsüba asoshi onoki Tsüngrem aser nenok ajak dang pelaba lemsateper.

Tsüngremi nenok ajak nem temoatsü tajungtiba mükeplokja moajangma.

Temeim kinungertem.

MULUNGNEN O

Kechiyong asenok shinga pei atema taküm malir aser pei atema masür. Kechiyong asenok taküm lira, asenok Kibuba atema taküm alir, aser asenok süra, asenok Kibuba meyong. ROM 14:7-8



Onoki meima aliba Ojala asür **Mrs Zulomongla Pongen** (Mongsenyimti) iba lima nungi pila aoba (6th June 2023) mapang kija, kibong aser lokti shirnokisa sarasadem, rongsen, nubo aser tsungdong tonga arua yaritepogo, nenok ajak dang kanga pelaba metetdaktsür.

Tsüngremi nenok taküm maneni moajangma ta ozü sarasadem.

~Kinungertem

Government of India

Ministry of Environment, Forest and Climate Change Wildlife Division

Sub: Advertisement for engagement of two Consultants on contractual basis in Ministry of Environment, Forests and Climate Change.

Applications are invited for two Consultants (Consultant -C-1 and Consultant C-2) in Wildlife Division of the Ministry of Environment, Forests and Climate Change on payment of Rs. 1.00 lakh for Consultant -C-1 and Consultant C-2.

Full details of the vacancy circular are available on Ministry of Environment, Forests and Climate Change website www.moef.nic.in under the link Circular.

The last date of receipt of application is 21 days from the date of publication of this advertisement in the newspaper.

CBC 13101/11/0003/2324

TEPELA LEMSATEPER



Asür B. YARMONGLA
ASO : 10-10-1951 ASÜ : 12-06-2023

Onoki teti meima aliba Asür B. Yarmongla takum alidang aser anojung onok nungi pila Tulusang Tsüngrem dangi aodang lenmang balala nungi yariteper ajak den kinunger temi pelaba lemsateper.

Ozü tetsü indang takum benjonga aser bilemtetdang, nenoki temeim mapa tajung inyakba ajanga ozü molung anisüngzüker aser tashi agütsür

~ Temeim kinungertem.

Level-0 coaching course agütsüogo



Dimapur, Aami/June 15 (TYO): Nagaland Cricket Association aser National Cricket Academy, Bengaluru na longjemer June 13 nungi 15 tashi Nagaland Cricket Academy, Sovima Chümoukedima nung LEVEL-0 COACHES COURSE

agütsüogo. Iba sentong nung District Cricket Associations balala nungi nisung 21-i shilem agia liasü. Anogo 3 coaching camp akaba mapang Karthik Jeshwanth aser Aarti Sankaran na shisalen agütsür liasü. Kasa mapang nung

Nagaland Cricket Association-i, district associations temi shilem tajung agiba atema kanga pelaba lemsatepba den maneni Nagaland nung cricket asaya renlokyonga aotsü atema kasa tejangraba nung inyaksangshitsü ayongzüka liasü.

Archery World Cup nung India team-i bronze medal 2 angu

Aami/June 15, 2023 (Agencies): Archery World Cup stage tasembuba nung India tetsür aser tebur compound team-i Bodhbarnü bronze medal ana nguogo.

Jawkar nungeri Colombia team 236-228 agi koka liasü. Iba masüdag Aditi-i under-18 world record yanglua temaba jenjang nung qualify asü.

Liko Arreola-i point 705 ngur aliba ajateta otsü tasen ka yangluogo.

Top-seeded tetsür team nung Aditi Swami, Jyothi Surekha Vennam aser Parneet Kaur nungeri tiebreaker nung Mexico team 232-232 (29*-29) agi koka bronze medal ngua liasü.

Arishi küm 16 tain asayar yagi taoba küm December ita Sharjah nung Asia Cup Leg-3 asayaba mapang silver medal angu aser tetsürtem compound asaya nung point 711 ngua temaba jenjang nung tembang.

72-arrow 50-metre qualification nung Aditi ya külem India tsür Jyothi aser Sara Lopez na dang nungi temaba jenjang nung tembanga liasü.

Teburtem asaya nung second-seeded team nung Abhishek Verma, Ojas Deotale aser Prathamesh

La taküm mezüngbuba World Cup season nung asayar aser lai taoba mapang

India tetsür compound team nungi Aditi, Jyothi (708) aser Parneet (700) nunger qualification nung temaba jenjang nung liasü ajisüaka parnoki Korea (2120) team-i world record yanglur aliba point ka agi memenep.

Police-i sexual harassment ken o nung Singh aitsüogo



Aami/June 15, 2023 (Agencies): Indian police-i Brehostibarnü sangdong ka ajanga ashiba agi, parnoki sexual harassment aser stalking ken o nung linük wrestling federation tir aitsüogo.

asera parnok den medemtsü atema akhangba asoshi aija liasü.

minor kati Singh anema benokba ken o kabo aginogo.

April ita wrestler tem telok kati Brij Bhushan Singh aputsü khanga linük yimtiba New Delhi nung longkak aita liasü. Singh ya Bharatiya Janata Party (BJP) nungi MP ka lir.

Delhi Police-i sangdong ka ajanga ashiba agi, ken o bushisüngdang tembanga sülen parnoki Indian Penal Code kübok sexual harassment aser stalking atema Singh aitsüogo.

Public prosecutor Atul Shrivastava-i, ken o benokba indang osang jangjatsüogo.

Singh ya Olympic medalist tem aser tanga Indian wrestling champions temi, parnok dak mebenshitsuiba yimya benshiba

Vinod Tomar shiba Singh kübok Wrestling Federation of India (WFI) indang assistant secretary liasü pa-a kasa ken o aser iba den 'criminal intimidation and abetment' dak sendakba nung aitsüogo.

Singh shiba term trokbuba Uttar Pradesh nungi MP ka lir, pa ya küm 12 dak tema wrestling federation tir liasü.

Pai pa anema ken o benokba ya magizük aser pa parliament nungi mintoktsü atema tasa asaba ka lir ta shia aruogo.

Longkak aitba wrestler tem rongnung world champion medallist Vinesh Phogat aser Olympic bronze medallist Sakshi Malik nunger densema liasü.

Mezüngbo parnok ishikati dang iba longkak ait tenzük ajisüaka mapang tatsüka dang lir nisung meyrejang aika aküm.

Olympics nung medal ngur alirtem rongnung javelin throw asayar Neeraj Chopra aser rifle shooter Abhinav Bindra nungeria parnok pusema liasü.

Asia Cup 2023 Pakistan aser Sri Lanka nung asayatsü

Mumbai, Aami/June 15 (Agencies): Asian Cricket Council (ACC)-i Brehostibarnü sangdong ka ajanga Asia Cup 2023 August 31 nungi September 17 tashi asayatsü ta sangdongogo.

yimden yimsüsüba tsütsü mangatetep aliba ajanga India-i Pakistan-i oa masayatsü ta shia liasü. Team ana ya team aika asayaba asayamung nung dang asaya arudar.

"Iba asayamung ya hybrid model ka nung asayatsü kong asaya pezü Pakistan nung asayatsü aser tanungba asaya teku Sri Lanka nung asayatsü," ta sangdong ajanga metetdaksü.

Iba dak sendakba nung Pakistan-ia Asia Cup ya tanga linük ka nung ayongzüka asayadaksüra parnoki India nung asayatsü aliba ODI World Cup nung shilem magitsü ta amokmerena liasü.

Iba asayamung nung India, Pakistan, Sri Lanka, Bangladesh, Afghanistan, aser Nepal ta ODI asaya 13 asayatsü.

Pakistan nung Lahore yimti nung asayatem ayongzüka asayatsü aser Sri Lanka nung Kandy aser Palkekele nung asayatsü.

Iba asayamung ya telok ana küma lemsar asayatsü aser telok anaprongla nungi temaba jenjang nung tembanga team anana Super Four stage atema qualify asütsü aser Super Four stage nungi temaba team ana final asayatsü.

Asia Cup ayongzüka asayatsü atema maongka agütsüba tetezü Pakistan October aser November ita India nung asayatsü aliba ODI World Cup nung asayatsü. India aser Pakistan na ya October 15 nü Ahmedabad nung alima nung cricket stadium tulutiba nung asayatsü imlar.

India aser Pakistan na

Indonesia Open: Srikanth Quarterfinals-i iogo



Aami/June 15, 2023 (Agencies): Brehostibarnü tang asaya aliba Indonesia Open World Tour Super 1000 event tebur kija asaya tanabuba round nung Kidambi Srikanth-i külem India nunger asayar Lakshya Sen madak takok ngua quarterfinals-i iogo.

Tanaba set nunga asayar anapronglai kanga junga asaya point 13buba tashi kanga tokepa asaya saka iba sülen Srikanth-i point trok atonga angu aser pai 20-14 agi tejakdang aküm.

India nunger asayar ana tsüngda kanga toktepa asayaago, saka Srikanth-i asaya nung kanga tongtibang mapang nung süngjemshir asaya 21-17 22-20 agi Sen madak takok ngua liasü. Tena tsüngda minute 45 asaya.

Srikanth-i asaya ayong ayonga akotsü ta bilema aliba mapang Lakshya-i pa menepa atua point 20-20 ta kasasa aküm. Ajisüaka tatem nung Srikanth-i süngjemshir asaya aser point ana atonga ngua takok angu.

Tena tsüngda tang tashi nung asemben asaya lir aser asembenprongla Srikanth-i kokogo.

Srikanth taruba asaya China nunger asayar Li Shi Feng den asayatsü, shiba Singapore nunger asayar Loh Kean Yew 21-19 21-14 agi kokogo.

Asaya Lakshya-i kanga junga tenzük aser pa 4-0 agi tejakdang liasü ajisüaka Srikanth-i pa menepa atu aser point 17-17 aliba mapang Srikanth-i court kanga junga amshia asayaba den attack asü tenzükba sülen point pezü atonga angu aser mezüngbuba set akok.

Tetsür kija asaya nung PV Sindhu-i maneni kanga kara tsükogo. Tanabuba round nung lai world number 3 Chinese Taipei tsür Tai Tzu Ying 21-18 21-16 agi mekoki liasü.

Sindhu taoba asayamung ana nungbo mezüngbuba round nung tsüka liasü.

Tena tsüngda tang tashi nung 24ben asayaago aser Tai Tzu-i 19benbo kokogo.

BILEMDANGANG
"Nai nisung ajak pelatsüsabo melitetsü; langa alir pela tokjang."